



*Kamis, 16 Agustus 2024*  
**Ogen: Jeremia 33: 6-9**



**Negara Si Dame**



**H**egel, sekalak filsuf Jerman ngenehen gerak sejarah dunia sebage gerak dialektika. Ertina, sada hal mpeturah lawanna jine. Keduana berhubungen ras saling bergeseken, dungna mpeturah hal si mbaru e me gabungan yang lebih baik. E me si igelari Hegel selaku sintesis.

Adi si perdiateken gerak sejarah bangsa Israel, kejahatan mpereh ukumen, janah ukumen mpereh pertobatan ras pertobatan mpeturah kedamen alu cara rekonsiliasi. Enda me si rusur terjadi i bas relasi antara Tuhan Dibata ras bangsa Israel. Lit piga-piga prinsip rekonsiliasi e me, kawiten antara ingatan ras keadilan. Maka rusur Tuhan ngingetken kerna keleng ateNa man bangsa e ras nginget uga perpadanenNa ras nini bangsa Israel, Abraham, Isak ras Jakup bagepe nggo lalap ipersingeti Tuhan kerna tetap ndalanken keadilan nandangi teman manusia. Tapi si terjadi maka bangsa Israel tetap i bas kejahatan ras pemberontakenna man Tuhan.

Prinsip si deban e me reparasi ras pengampunen. Enda sada usaha bangsa e guna mbangun kembali kegeluhenna si setia man Tuhan kenca iukum Tuhan. Janah reparasi labo banci jadi adi la kin lit pengampunen i bas Tuhan nari. Hal si e me si teridah i bas padan Tuhan man Jeremia kerna bangsa Israel, maka Tuhan si nambari negeri e ras si mereken kejuah-juahen. Ibahan Tuhan kedamen ras ketenengen janah dosa-dosana pe ialemi Tuhan. Jerusalem si enggo ireparasi ras iampuni jadi negeri ulu keriahen, kehamaten ras kemegahen.

Dame banci nge terjadi i ja pa pe adi lit pertobatan ras reparasi diri bagepe ngarapken pengampunen i bas Tuhan nari maka turah arapen akan masa depan si lebih baik. Mekatep la sadar entah sadar terjadi me dosa e. Silakoken dosa e, tapi selaku kalak si erkiniteken minter pindo pengalemi dosa sabap i je nari me rehna kedamen e. Mari erlumba maba kedamen i ja pa pe kita ringan.